



Llywodraeth Cymru  
Welsh Government

---

## DATGANIAD YSGRIFENEDIG GAN LYWODRAETH CYMRU

---

**TEITL** Rheoliadau'r Polisi Pysgodfeydd Cyffredin (Diwygio etc)  
(Ymadael â'r UE) (Rhif 2) 2019

**DYDDIAD** 1 Mawrth 2019

**GAN** Rebecca Evans AC, Y Gweinidog Cyllid a'r Trefnydd

Rheoliadau'r Polisi Pysgodfeydd Cyffredin (Diwygio etc) (Ymadael â'r UE) (Rhif 2) 2019

### Offerynnau Ewropeaidd sy'n Uniongyrchol Gymwys

- Rheoliad Dirprwyedig y Comisiwn (EU) 2018/2034 sy'n sefydlu cynllun gwaredu ar gyfer pysgodfeydd dyfnforol yn nyfroedd y Gogledd-orllewin ar gyfer 2019-2021.
- Rheoliad Dirprwyedig y Comisiwn (EU) 2018/2035 sy'n pennu manylion gweithredu'r rhwymedigaeth lanio ar gyfer pysgodfeydd dyfnforol ym Môr y Gogledd ar gyfer 2019-2021.
- Rheoliad Dirprwyedig y Comisiwn (EU) 1395/2014 sy'n sefydlu cynllun gwaredu ar gyfer pysgodfeydd pelagig bach penodol a physgodfeydd ar gyfer dibenion diwydiannol ym Môr y Gogledd.
- Rheoliad y Cyngor (EU) 2018/2025 sy'n pennu ar gyfer 2019 a 2020 y cyfleoedd pysgota ar gyfer cychod pysgota'r Undeb ar gyfer stociau pysgod dyfnforol penodol.
- Rheoliad y Cyngor (EU) 2019/124 sy'n pennu'r cyfleoedd ar gyfer 2019 i bysgota stociau pysgod a grwpiau o stociau pysgod penodol, sy'n gymwys i ddyfroedd yr Undeb ac, ar gyfer cychod pysgota'r Undeb, mewn dyfroedd penodol nad ydynt yn perthyn i'r Undeb.

### **Unrhyw effaith y gall yr OS ei gael ar gymhwysedd deddfwriaethol y Cynulliad a/neu ar gymhwysedd gweithredol Gweinidogion Cymru**

Mae pysgodfeydd yn faes sydd wedi'i ddatganoli, ac mae gan Cynulliad Cenedlaethol Cymru (y "Cynulliad") gymhwysedd deddfwriaethol eang yn y maes hwn mewn perthynas â Chymru.

Bydd yr OS hwn yn estyn pwerau gweithredol Gweinidogion Cymru. Bydd yn trosglwyddo rhai o bwerau cyfredol y Comisiwn Ewropeaidd i Weinidogion Cymru mewn perthynas â

Chymru. Mae'r Rheoliadau hyn yn cynnwys darpariaethau sy'n galluogi Gweinidogion Cymru i arfer swyddogaethau gweinyddol mewn perthynas â Chymru yn ddilyffethair.

Ni fydd yr OS hwn yn cael unrhyw effaith ar gymhwysedd deddfwriaethol y Cynulliad.

### **Diben y diwygiadau**

Mae'r offeryn hwn yn gwneud newidiadau o ran gweithredadwyedd o dan adran 8 o Atodlen 7 i Ddeddf yr Undeb Ewropeaidd (Ymadael) 2018, a pharagraff 21(b) ohoni, i'r offerynnau y cyfeirir atynt uchod, er mwyn mynd i'r afael â diffygion mewn deddfwriaeth sy'n ymwneud â'r Polisi Pysgodfeydd Cyffredin, o ganlyniad i'r DU yn ymadael â'r Undeb Ewropeaidd. Mae enghreifftiau o'r newidiadau technegol a wneir gan yr OS hwn yn cynnwys newid cyfeiriadau o'r "Undeb Ewropeaidd" i'r "Deyrnas Unedig"; ac "Aelod-wladwriaeth" i "gweinyddiaeth pysgodfeydd", i alluogi Gweinidogion Cymru fel Gweinyddiaeth Pysgodfeydd mewn perthynas â Chymru i gyflawni eu swyddogaethau penodol ar ôl ymadael â'r UE. Yn debyg, bydd cyfeiriadau at gychod a dyfroedd yr Undeb neu'r Aelod-wladwriaeth yn cael eu newid i gychod a dyfroedd y DU.

Bydd y newidiadau hyn yn sicrhau bod pysgota yn nyfroedd y DU yn parhau i gael eu rheoleiddio mewn ffordd gynaliadwy ar ôl i'r DU ymadael â'r UE, ond nid oes unrhyw newidiadau o sylwedd yn cael eu gwneud i effaith y Polisi Pysgodfeydd Cyffredin nac i'r ffordd y mae pysgodfeydd yn ymgymryd â'u gweithgareddau.

Mae'r Rheoliadau a'r Memorandwm Esboniadol cysylltiedig, sy'n nodi effaith y diwygiadau, i'w gweld yma: <https://beta.parliament.uk/work-packages/TRhsL5IM>

### **Pam y rhoddwyd cydsyniad**

Rhoddwyd cydsyniad i Lywodraeth y DU wneud y cywiriadau hyn o ran ac ar ran Cymru, am resymau'n ymwneud ag effeithlonrwydd, hwylustod ac oherwydd natur dechnegol y diwygiadau. Ar ôl ystyried yn llawn ac yn ofalus y diwygiadau arfaethedig, asesiad o'r cyfarwyddiadau polisi a dadansoddiad cyfreithiol o'r gwaith drafftio, nid oes unrhyw wahaniaeth o ran polisi. Diben y diwygiadau hyn yw sicrhau bod y llyfr statud yn parhau i weithio ar ôl i'r DU ymadael â'r UE. Mae hyn yn unol â'r egwyddorion ar gyfer cywiro y cytunwyd arnynt ym mis Mai 2018 gan Is-bwyllgor y Cabinet ar y Trefniadau Pontio Ewropeaidd.